



La truppa dils Cadonau avon la basa, la casa Radieni, a Flond: Peter, Judith, Ronny, Toni, Orlando, Didier, Gion e Lillian (da sen.).

FOTO AUGUSTIN BEELI

## Velo – pissiun da famiglia

In' interpresa da bike da treis fargliuns

■ (fmr/abc) La stad che varga ei extraordinaria. Aunc mai han tons Svizzers scuvretg las attracziuns dall'atgna tiara durent la stad. Quei ei stau d'engrau a Peter Cadonau da Flond. L'entschatta matg hagen els entschiet, raquenta Peter Cadonau. El hagi cun quei saviu realisar in'idea ch'accumpongi el dapi 12 onns. Igl ei in survetsch che muncava ella regiun. Fertion ch'ei dat guids da muntogna e guids da viandar dat ei per ciclistas nuot. Ella destinaziun Flem Laax Falera dat ei ina purschida, el perimenter turistic dad l'lanz/Glion, Lumnezia, Sursaisa Mundaun e Breil existeva nuot semegliant. Malgrad che mintga ciclistas pesenta independents e habels dad ir persuns ina ruta cul bike gaudan auters sch'els san profitar d'in guid. Quel va ordavon, dat cussegl, sustegn en situaziuns malsegiras. Sch'el ei vitier tut in indigen ei quei aunc bia meglier. Lu enconuscha el buca mo la tecnica dad ir cul bike, mobein era mintga trutt e pitgogna. Gest quei muncavi ella regiun amiez la Surselva. Cun 59 onns ei Cadonau sedecidiu definitivamein da fundar in'organisaziun. Persuls cun sia partenaria Judith Brennwald havessen els buca giu la pusseivladad da realisar l'idea. Omisdu ein engaschai en lur

professionis, pia han els encuretg partenaris.

Lunsch ei Cadonau buc ius. El saveva nua spluntar. «Jeu hai dumandau mes frars ed ils nevs sch'els savessen s'imaginar da luvrar pil project Cadventure. Buca mo il num creativ – igl ei ina cumbinaziun da 'Cadonau' ed 'adventure' – ha plaschiu als frars. Il pasterner Gion ed il pur Toni, lur fegls Ronny, Orlando e Didier Cadonau, sco era a Lillian, la dunna da Toni, ein stai incantai dall'idea. Els tuts ein occupai en lur mistregns, han denton ina pissiun dil temps liber: ir cul bike. Aschia ei ina gruppa dad ogt seformada enteifer in'jamna e mesa. Il zercladur han els menau las empresas gruppas sin turas. Ina part d'els ha experienscha cun hosps tras la lavur sco scolast da skis, tschella sco construiders da trails ni mecanists. Mintgin ha atgnas fermezzas, mintgin ei era responsabels per in sector.

Surselva Turissem cun siu meinagestiu Kevin Brunold ed il meinaressort Simon Coray e las treis fatschentas indigenas Menzli Sport, Sport Beat e Cresta Sport sustegn la scola da bike. Era cun hotels ed ustrias ella regiun ha Peter Cadonau saviu fixar cunvegns. «Ils contacts e resuns ein empermettents naven dall'entschatta,

la reit funcziuna gia stupent», resumescha Peter Cadonau. Sia quinada Lillian Cadonau sustegn ils sis guids sco terapeuta reconuschida. Sia partenaria Judith tgira ils contacts, ella ha creau la grafica e la pagina d'internet, plinavon sustegn Judith Brennwald la squadra cun lavurs administrativas.

Cun ses dus frars ed ils treis nevs vul Peter Cadonau menar excursiuns adattadas allas fermezzas da gruppas e porscher trenaments per affons e juvenils. Basa da partenza vegn savens la casa paterna dils treis frars ad esser.

### La casa Radieni ei la basa

La casa Radieni a Flond, renovada dacuort, ei la basa, cheu san tochen ogt persunas pernottar e guder il vitget e siu vast contuorn. La truppa dils Cadonau vul mussar als hosps la cuntrada d'omisduas varts dil Mundaun e dil Rein anteriur. Ton velos cun batteria e velos tratgs mo dallas musclas pretendan empau tecnica, dumignar il vehichel augmenta il plascher dad ir cul bike. «Ir cun velo sa mintgin», manegjan ins meinsvart. Ch'igl ei auter cumprovan ils guids da Flond. Vestgi cun lur tricots unificai entaup'ins els pli e pli silas aventuras ella regiun.

## LAAX

### Dus artists da Sagogn

(fmr/abc) Dapi ch'ell'ei s'aviarta il december 2018 seproflescha la casa d'art e cultura Cularta a Laax cuntinuadamein cun exposiziuns ed occurrenz. Per artistas ed artists sco era glied interessada eis ei daventau in liug dallas scuvretgas. Actualmein ein lavurs dil sculptur da Glion Christian Aubry e da siu emprendist Florian Fuchs exponidas. L'exposiziun «Recipro – Wechselseitig» va aunc tochen ils 30 d'uost. Lu suonda la proxima: Ils 5 da settember ei l'avertura dall'exposiziun «concret». Ils visitaders han caschun d'emprender d'enconuscher dus artists da Sagogn e lur ovras. Urs Cavelti e Walter Derungs ein carschi si a Sagogn. Lur via ha menau els dil Rein giu, dapi biars onns vivan e lavuran els a Basilea. Lur lavur expressiva sedifferenzie-

scha pulit, cuntegn denton era parallelas. Il concepider Cavelti explorescha ils cunfins denter art e mobiliar, design e spazi da viver. A Basilea eis el s'establiu cun sia lavur e survegn era cuntinuadamein spazi per mussar quella ell'entira Svizra. Siu camerat da Sagogn Derungs ha medemamein frequentau a Basilea la Scol'aula d'art. Derungs ei enconuschents tras sias ovras fotograficas nua ch'el metta la vanada e l'inconstanza el center. Ton Cavelti sco Derungs han exponiu meinsvart el Grischun, els ein denton pli enconuschents giu la Bassa ch'en lur patria. Ella Cularta a Laax han ins caschun d'emprender d'enconuscher els e lur lavur artistica naven dils 5 da settember tochen la fin d'october.

## VUORZ

### Il temps medieval el focus

(cp/fmr) Il «Luvratori Meister da Vuorz» organisescha las proximas jamnas plirs arranschaments cun investa en baghetgs dil temps medieval a Clugin en Val Schons, Tumeigl, Glion e Curvalda. Quels stattan el center dalla damonda: Co era il temps medieval? Per eruir quei ha ei num sefatschentar dils detagls, seigi en connex cun excavaziuns archeologicas ni tier restauraziuns d'objects historics. Persunas dil fatg dattan investa en quei temps ed els misteris. Sco quei ch'els organisaturs communicheschon settracta ei da guidadas che sefatschentan buca mo dall'antica, mobein era

dil temps present. Pusseivladads da far enconuschentscha cun quei temps sepor-schan per exempel enten scuvrier la tecnica dalla ligiadura dalla preit ella baselgia da Clugin cun Brigit Büttikofer e las lavurs d'excavaziun da sogn Murezi a Tumeigl cun Ursina Jecklin-Tischhauser. A Glion vegn dau investa dall'antieriura baselgia da s. Martin sur Glion cun Manuel Janosa ed a Curvalda dalla baselgia claustrala cun Hans Rutishauser.

Ils detagls davart ils arranschaments ein d'anflar silla pagina [www.waltensburger.ch](http://www.waltensburger.ch)

## CLAUSTRA DA MUSTÉR

### Sentupada dalla giuventetgna

(cp/gc) Alla fin da quest'jamna, ils 29 e 30 d'uost, ha ina sentupada, l'aschinunada vigelgia dalla giuventetgna, liug ella claustra da Mustér. Igl ei in'occurranza per s'aprofundir ella veta cristiana. Participontas e participontas van alla tscherca da respostas sin las damondas che pertuccan quella. Il tema da quei inscunter secloma perquei: «Carezia e relaziun». Plidentai tras referats,

reflexiuns e brats vegnan giuvens carstgauns denter 16 e 35 onns. Quei sefa en connex cun separticipar all'oraziun dils claustrals, ina vigelgia intensiva d'oraziun la sonda sera en buna cuminonza denter giuvens carstgauns.

Annunzias veglien ins drizzar a: [jung@kloster-disentis.ch](mailto:jung@kloster-disentis.ch)

## Cun in «Viva» sin Flurin

Il Chor mischedau Laax cuntinuescha il project «150 onns Flurin Camathias»

■ (fmr/abc) Dacuort ein cantaduras e cantadurs puspei s'entupai. Cun ina sera da cumpignia ha il Chor mischedau da Laax relantschau ina part dil program giubilar pil poet Flurin Camathias. Ils 6 da mars 2020 ei stau il 149avel gi da naschientscha da Flurin Camathias. La sera avon era il chor da project s'entupaus a sia emprova jamnila dil program. Il Chor mischedau da Laax cul dirigent Rest G. Tuor haveva entschiet dus meins avon ils exerchez per «Viva Flurin!» In'jamna pli tard, la gievgia dils 12 da mars, era la pandemia pli avanzada. Ch'ei seigi per varga sis meins la davos'emprova havess negin spitgau. Il gi suenter han las autoritads cantunales e federalas decretau il «lockdown». L'jamna vargada, in miez onn pli tard, ha la suprastanza dil chor envidau ad ina sentupada ed annunziau che las emprovas cuntinueschian. Il president Erwin Ardüser e sias consuprastontas Rita Bass, Catia Tschuur e Carlina Caviezel, ensemen cul dirigent Rest G. Tuor, han decidu ch'igl ei responsabel da cuntinuar. Secapescha cullas mesiras da corona, vul gir distanza duida e plaz avunda ell'aula dalla casa da scola enstagl ella sala dalla Sentupada.

### Era in chor d'affons

Igl atun vegn il comite d'organisaziun a saver decider definitivamein tgei projects

ch'ins sa propi realisar. Eventualmein stoppien ins desister ni redimensiunar ina ni l'autra caussa, ha Ardüser remarcu. En scadin cass ei il concert communal dil chor viril e chor mischedau previus sil gi exact dil 150avel anniversari da Flurin Camathias. Il termin ei ideals, igl ei la sonda dils 6 da mars 2021.

Aposta per render honur al grond poet sursilvan han ils dus chors da Laax entschiet il schaner 2020 ad exercitar il program cun cumposiziuns novas da Gion Balzer Casanova e Gion Andrea Casanova. Era in chor d'affons vulan ins formar sil giubileum. Rinaldo Camathias, oz cantadur profilau, ei staus sez biars onns commember dil chor d'affons da Laax. El vegn a direger e menar quei project parzial. Il chor d'affons duei seprentar per l'emprema gada a caschun dil concert giubilar dils 6 e 7 da mars 2021.

Il concept «Viva Flurin!» portan e sustegn biars, denter auter la vischnaunca da Laax, uniuns e scola sco era artistas ed artists dalla regiun. Co ed en tgeifuorma ch'ins sa realisar il cuntegn dil concept vegn a semussar ils proxims meins. Suenter la pausa d'in miez onn ei il comite vidlunder da coordinar e sur-luvrar il concept. Sper il project parzial da cant dat ei manifestaziuns en museum e biblioteca, ei dat installaziuns audiovisuals, ina scartira giubilara, in'exposi-

ziun ambulonta a Laax, Breil, Andiast e Siat. Previda ei era ina tura auditiva enramada da ramurs e musica, ei dat installaziuns da glisch e las fontaunas dil vitg a Laax vegnan ad esser renovadas sigl onn giubilar da Flurin Camathias.

L'jamna vargada, alla sera da cumpignia, ha la suprastanza dil chor mischedau vuliu trer «ord las taunas» cantaduras e cantadurs. Igl ei semussau che las

mesiras ordinadas dallas autoritads, cun distanza duida, fan negins fastedis. Era sch'igl ei buca pusseivel da cantar senza fin durent ina tala sera entuorn meisa han tuts presents giu tschaffen da tgirar puspei inagada ils contacts socials. Per sluccar e tuchegiar ha il president organisau in legher quiz «Flurin Camathias» cun diesch damondas entuorn il poet e sia biografia.



La suprastanza dil Chor mischedau da Laax ei da buna speranza pil project giubilar «Viva Flurin!»: Carlina Caviezel, Rest G. Tuor, Rita Bass ed Erwin Ardüser. Silla foto maunca Catia Tschuur.

FOTO AUGUSTIN BEELI

reclama

Die SVP-Initiative will die Personenfreizügigkeit mit der EU beenden. Damit zwingt sie die Schweiz zur Kündigung der Bilateralen, ohne eine Alternative anzubieten. Inmitten einer Krise. Das ist verantwortungslos.

**NEIN** zur radikalen Kündigunginitiative

[kündigung-nein.ch](http://kündigung-nein.ch)

Essas Vus gia commember?

Procap Grischun  
Hartbertstrasse 10, 7000 Cuir  
Tel. 081 253 07 07, PC 70-7755-0

per persunas cun handicap **procap grischun**